

आकाशवाणी जयपुर-अजमेर
प्रादेशिक समाचार

- ख्यातनाम चितक अर शिक्षाविद् डॉक्टर श्यामा प्रसाद मुखर्जी री जयंती माथे राष्ट्र वां ने सिरधा रे साथे याद करें
- प्रदेश मांय न्यारी-न्यारी ठोडां हजरत इमाम हुसैन री शहादत री याद मांय मुहर्रम रो पर्व रीति मुजब मनायो जावें
- देवशयनी एकादशी रे मौके आज राज्य मांय न्यारा-न्यारा धार्मिक आयोजनं
- राज्य रा न्यारा-न्यारा हलकां मांय मॉनसूनी बारिश रो दौर चाले-आवता दो-तीन दिन कोटा, उदयपुर, भरतपुर अर अजमेर संभागां मांय कठे-ई-कठे भारी बिरखा रा आसारं

000

ख्यातनाम चितक अर शिक्षाविद् डॉक्टर श्यामा प्रसाद मुखर्जी री आज जयंती हैं ई मौके न्यारा न्यारा कार्यक्रम आयोजित करने वां ने श्रद्धांजलि दीरीजीं प्रधानमंत्री नरेन्द्र मोदी सोशल मीडिया संदेश मांय कयो के डॉक्टर मुखर्जी देश रा सन्मान, मर्यादा अर मान री हिफाजत सारू आपरा प्राण न्यौछावर कर्यां वटे ई केंद्रीय सहकारिता मंत्री अमित शाह गुजरात रा आणंद मांय सहकारिता मंत्रालय रा चार साल पूरा होवण माथे राख्यी ज्या जळसा मांय बोलता डॉ. मुखर्जी रा राष्ट्र निर्माण मांय योगदान री सराहना करीं वणा कयो के डॉ. श्यामा प्रसाद मुखर्जी नी व्हेता तो कश्मीर भारत रो अभिन्न अंग नी व्हेतों

ई मौके मुख्यमंत्री भजनलाल शर्मा जयपुर मांय आपरा रेहवास माथे जनसंघ रा संस्थापक डॉ. मुखर्जी रा चित्र माथे पुष्प अर्पण करने श्रद्धांजलि दीं आपरा संदेश मांय वणा श्यामा प्रसाद मुखर्जी ने नमन करता कयो के राष्ट्र री एकता, अखंडता अर संप्रभुता सारू वां रो बलिदान सगळा ने हमेश देश सेवा सारू सीख देवतो रेहवेलां प्रदेश री न्यारी-न्यारी ठोडां डॉ. मुखर्जी री जयंती माथे वां ने श्रद्धा रे साथे याद करी ज्यां राजसमंद मांय मुखर्जी चौराहा माथे डॉ. श्यामाप्रसाद मुखर्जी री मूरत माथे फूल अर्पण करने श्रद्धांजलि दीरीजीं चूरू, सवाईमाधोपुर, बांसवाडा अर पाली मांय ई डॉ. मुखर्जी री जयंती माथे संगोष्ठी अर श्रद्धांजलि सभा रो आयोजन करी ज्यों

000

प्रधानमंत्री नरेन्द्र मोदी ब्राजील रा रियो डी जेनेरियो मांय आज रात सरू व्हे रिया ब्रिक्स शिखर सम्मेलन मांय हिस्सो लेवें सम्मेलन रो मकसद सदस्य देशां रे बीचे मदद ने बधावो देवणो हैं 17वां ब्रिक्स शिखर सम्मेलन मांय वैश्विक शासन सुधारां अर जलवायु परिवर्तन ऊं जुडी चुनौतियां रे अलावा दूजा मुद्दां माथे ई चर्चा व्हेलां सम्मेलन रे दौरान प्रधानमंत्री श्री मोदी केई नेतावां साथे चर्चा ई करेलां दो दिन रा सम्मेलन रे पछे श्री मोदी ब्राजील री राजधानी ब्रासीलिया जाएलां दोन्यू देशां रे बीचे गहरा कार्यनीतिक संबंधां रा बारा मांय प्रधानमंत्री ब्राजील रा राष्ट्रपति इनाशियो लुला डी सिल्वा रे साथे बतळ करेलां

000

पैगम्बर हजरत मोहम्मद साहब रा नवासा हजरत इमाम हुसैन अर वां रा 72 साथियां री शहादत री याद मांय आज मुहर्रम मनायो जावें प्रधानमंत्री नरेन्द्र मोदी सोशल मीडिया पोस्ट मांय कयो के हजरत इमाम हुसैन विपरीत परिस्थितियां मांय ई सांच माथे अडिग रेहवण री प्रेरणा दीं ई मौके प्रदेश मांय न्यारी-न्यारी ठोडां ताजियां रा जुलूस निकाळ्या जावें राजधानी जयपुर मांय दोपहरां पछे मातमी धुनां रे साथे ताजियां रा जुलूस सरू व्हीयां आ मांय सोना अर चांदी ऊं बण्या ताजिया खास ध्यान देवण रा केन्द्र हैं आं ताजियां ने देर सिंज्या करबला मांय सुपुर्द ए खाक करया जाएलां जुलूस ने देखता शहर

मांय पुलिस प्रशासन कानून बन्दोवस्त अर यातायात रा खास इंतजाम कर्या हैं संवेदनशील हलकां मांय झोन री मार्फत निगराणी राखी जावें पुलिस लोगां ने भाईचारा रे साथे ओ दिन मनावण री अरज करी हैं उदयपुर ऊं म्हारा खबरनवीस बतायो के शहर मांय न्यारी-न्यारी ठोड़ां जुलूस निकाळ्या जावें

.....
सवाईमाधोपुर अर राजसमंद मांय ई करडी हिफाजत रे बीचे ताजियां रा जुलूस निकाळ्या जावें

000

केन्द्र सरकार रा उपभोक्ता मामला रो मेहकमो अर भारतीय मानक ब्यूरो देशभर रा उपभोक्तावां ऊं फगत बीआईएस प्रमाणित हेलमेट ई काम मांय लेवण री अरज करी हैं मेहकमो बीआईएस प्रमाणन रे बिना हेलमेट बणावण अर बेचण रे खिलाफ करडी कार्यवाही करण री ई अरज करी हैं मेहकमो कह्यो है के भारत री सड़का माथे 21 करोड़ ऊं बत्ती दुपहियां वाहन हैं ई कारण चलावण वाळा री हिफाजत घणी मेहताऊ हैं सड़क सुरक्षा बधावण अर उपभोक्तावां ने घटिया हेलमेट ऊं बचावण सारू बीआईएस लारला रोकड बरस मांय 30 ऊं बत्ती तलाशी अर बरामदगी अभियान चलायां मोटर वाहन कानून, 1988 रे तैत दोपहिया वाहन चालका सारू हेलमेट पहरणो जरूरी हैं

000

आज देवशयनी एकादशी रे मौके प्रदेश मांय न्यारा-न्यारा धार्मिक आयोजन कर्या जावें जयपुर रा आराध्य गोविंद देव जी रा मिन्दर मांय आज संवारा ऊं श्रद्धालुआं रो आवणो लाग्यो हैं म्हारा खबरनवीस बतायो के करौली रा नामी मदन मोहन जी मिन्दर अर दूजा मिन्दरां मांय देवशयनी एकादशी माथे खास झांकी सजायी ज्यीं

.....
डूंगरपुर मांय धनेश्वर मंडल कानी ऊं शहर रा मुरलीधर मिन्दर ऊं आज वन यात्रा रो आयोजन करी ज्यो वटे ई वनेश्वर महादेव मिन्दर मांय चोखी बिरखा री कामना करता खास पूजा करीजीं डीग जिला रा पूंछरी मांय मुड़िया पूनम ने देखता गोवर्धन री सात कोसी परिक्रमा देवण वाळा रो उमाव परवान माथे हैं मुख्यमंत्री भजनलाल शर्मा देवशयनी एकादशी माथे प्रदेशवासियां ने शुभकामनावां देता भगवान विष्णु ऊं सगळा रा कल्याण री प्रार्थना करीं वटे ई प्रधानमंत्री नरेंद्र मोदी आषाढ़ एकादशी रे मौके आज देशवासियां ने शुभकामनावां दीनीं आपरा सोशल मीडिया संदेश मांय भगवान विठ्ठल ऊं समाज मांय सुख समृद्धि री कामना करीं

000

कश्मीर घाटी मांय अमरनाथ यात्रा सारू आज संवारा सात हजार दो सौ आठ तीर्थ जातरियां रो पांचवो जत्थो रवाना व्हीयो जम्मू मांय भगवती नगर यात्री-निवास आधार-शिविर ऊं रवाना व्हीया ई जत्था मांय 5 हजार 258 आदमी, 1 हजार 587 महिलावां, 30 टाबर अर 333 साधु-संत भेळा हैं आ सगळा तीर्थ यात्री आज पहलगाम आधार शिविर पूगेला अर वटे ऊं पवित्र गुफा सारू यात्रा सरू करेलां

000

कैलाश मानसरोवर रा तीर्थ जातरियां रो दूजो जत्थो आज आपरी जातरा पूरी करने पाछो गंगटोक आय ग्यो 47 तीर्थ जातरियां वाळो दूजो जत्थो 25 जून ने नाथूला सरहद पार करने आपरी तीर्थ जातरा सरू करी हीं तीर्थ जातरियां बेरोक-टोक इंतजाम अर मेहमानबाजी सारू सिक्किम सरकार रो आभार जतायो हैं ऐतिहासिक कैलाश मानसरोवर जातरा री सरूआत नाथूला ऊं लारला म्हीना री 20 तारीख ने व्ही ही, जठै 36 तीर्थ जातरियां ने सिक्किम रा राज्यपाल ओम प्रकाश माथुर ऊं मुलाकात करी अर उण रे पछे अठे ऊं जातरा ने हरी झंडी दिखाई ज्यीं

000

प्रदेश रा न्यारी-न्यारी ठोड़ां बिरखा रो दौर चालें लारला चौबीस घंटा मांय केई ठोड़ां हळका ऊं भारी बिरखा दर्ज करीजीं मौसम केन्द्र जयपुर मुजब सब ऊं बत्ती 21 सेंटीमीटर बिरखा सवाईमाधोपुर रा चौथ का बरवाड़ा मांय दर्ज व्हीं राजधानी जयपुर मांय ई आज हळकी बिरखा व्हीं सिरौही मांय जिलाभर मांय रुक रुकने बिरखा व्हे री हैं मौसम सुहावणो होवण ऊं माउंटआबू मांय सैलाणियां री आवक बध ग्यी हैं ब्यूरो म्हारा खबरनवीस ऊं-

.....
मौसम महकमा मुजब आवता दो-तीन दिन कोटा, उदयपुर, भरतपुर, अजमेर अर जयपुर संभाग मांय कुछ ठोड़ां माथे हळका ऊं मझला अर कठे-ई-कठे भारी बिरखा होवण री आस हैं वठै जोधपुर अर बीकानेर संभाग मांय कठे-ई-कठे बिरखा होवण रा आसार हैं

000

प्रदेश मांय आज दो न्यारा-न्यारा सड़क हादसां मांय छह लोगां री मौत व्हे गयीं बारां जिला मांय लारली रात एक सड़क हादसा मांय चार लोगां री मौत व्हे गयीं ओ हादसो राष्ट्रीय राजमार्ग-27 माथे गजनपुरा रा हाड़ौती पैनोरमा कने व्हीयो, जठै लखनऊ ऊं कोटा जाय री एक कार खड्डो बचावण री कोशिश मांय आगे चाल रिया वाहन ऊं टकराय गयीं ई हादसा मांय तीन लोगां री मौका माथे ई मौत व्हे गयी अर एक घायल युवती ईलाज रे दौरान दम तोड़ दियो दूजा आदसा मांय भरतपुर जिला मांय राजमार्ग 21 माथे लुलहारा गांव कने दो ट्रकां री टक्कर मांय दो लोगां री मौत व्हे गयीं जाणकारी मुजब ओ हादसो सड़क किनारे ऊबा ट्रक मांय दूजा ट्रक रे टक्कर मारण ऊं व्हीयो

000

राजस्थान प्रदेश कांग्रेस कमेटी रा नुवा मुख्यालय भवन रे बणायी-चुणायी रो काम आज जयपुर रा मानसरोवर मांय विधिपूरण पूजा-अर्चना रे साथे सरू व्हीयो ई मौके पैली रा मुख्यमंत्री अशोक गहलोत, कांग्रेस प्रदेशाध्यक्ष गोविंद सिंह डोटासरा, नेता विपक्ष टीकाराम जूली, प्रदेश प्रभारी सुखजिंदर सिंह रंधावा समेत खास नेता मौजूद रियां

000

पाली मांय महिलावां ने साइबर धोखाधडी ऊं बचावण रा मकसद ऊं जागरूकता शिविर लगायो जावें न्यारा-न्यारा सामाजिक संगठन संस्थावां कानी ऊं लगाया जावण वाळा ई शिविर मांय महिलावां मांय मोबाईल फोन रा वाजिब उपयोग री जाणकारी दी जावें शिविर मांय साइबर जाणकारां कानी ऊं ऑनलाइन फ्रॉड ऊं बचावण, ऑनलाइन भुगतान रा सही तरीका री खास जाणकारी दी जावें

000